

Nunatsinni piniartut aalisartullu piniakkanut aalisakkanullu ilisimasaasa katersorneqartalernissaat ilisimasaallu ilisimatusarnikkut atorneqarlutillu nalilersuutaasarnissaat siunertaralugu Pinngortitaleriffik pillugu inatsisartut inatsisissaata nutarterneqarnissaannik Naalakkersuisut peqquneqassasut Inatsisartut aaliangiiffigisassaattut suinnersuussut. Inatsit nutartigaq UPA2025-mi saqqummiunneqassaaq.

(Inatsisartunut ilaasortaq Mikivsuk Thomassen, Inuit Ataqatigiit)

Akissuteqaat

(Nunalerinermut, Imminut Pilersornermut, Nukissiuutinut Avatangiisinullu Naalakkersuisoq)

Siullermeerneqarnera

Naalakkersuisut sinnerlugit Inatsisartunut ilaasortaq Mikivsuk Thomassen, Inuit Ataqatigiit, aalajangiiffigisassatut siunnersuummik saqqummiussineranut qutsavigaara.

Naalakkersuisuniit piniartut aalisartullu piniakkat aalisakkallu pillugit ilisimasaat naleqarmata, aammalu pisuussutiniq uumassuilinnik ilisimatusarnermut ingerlatsinernullu atorneqartussaammata tamakkiisumik taperserparput.

Aalisakkat piniakkallu pillugit ingerlatsineq Aalisarnermut Inatsit, Piniarnermut Inatsit aamma Pinngortitamik Illersuinermut Inatsit tunngavigalugit suliarineqarpoq. Pisuussutsit uumassusillit pillugit ingerlatsinermit ilisimatusarnikkut siunnersuinerit aamma aalisartut piniartullu ilisimasaasa akuutinneqarnissaannik pingaartitsineq pingaaruteqarput. Namminersorlutik Oqartussat aalisartuniit piniartuniillu tusarniaanermi akissuteqaatinik siunnersuutinillu Aalisarnermut Siunnersuisoqatigiit aamma Piniarnermut Siunnersuisoqatigiit aqutugalugit pissarsisarput, ilisimasallu taakku ilisimatusarnikkut siunnersuinerit ilanngullugit pisuussutsit pillugit ingerlatsinermit tamakkiinerusumut iluaqutigineqartarput.

Ilisimatusarnikkut siunnersuinerit Pinngortitaleriffimmit toqqaannartumik imaluunniit nunani tamalaani suliniaqatigiiffiit, Naalakkersuisoqarfiit Pinngortitaleriffiullu paasissutissanik nassiussivigisartagaat aqutugalugit pissarsiarineqartarput. Pinngortitaleriffik pillugu inatsimmi maanna atuuttumi ilisimatusarfiup nunani tamalaani suliniaqatigiiffinnut, Namminersorlutik Oqartussanut siunnersuisartunut piunasaqaatinik naammassinissinnaanissaa qulakkeerneqarpoq. Inatsimmi ilisimatusarfiup innarligassaannginnera soqutigisanullu immikkut ittunut attuumassuteqaannginnera illersorneqarpoq. Inatsimmi ilaatigut Pinngortitaleriffiup isumalluutiniq uumassuilinnik atuineq illersuinerlu pillugit paasissutissanik katersuineq, suliaqarneq naliliisarnerlu suliaassarigai allassimavoq. Pinngortitaleriffiup nammineeerluni suliaassat taakku suliarinissaannut paasissutissanut tunngaviusut annertuut katersortarpari, kisiannili suliaassat tamarmiusut taamaallaat Pinngortitaleriffiup aalisartunik piniartunillu annertuumik suleqateqarnera pissutigalugu suliarineqarsinnaapput.

Piniartut aalisartullu ilisimasaat, ilisimatusarfiup sulineranut tapertaasinnaatillugit Pinngortitaleriffimmit annertuumik akuutinneqartarput. Assersuutigalugu apersuilluni misissuinerit, aalisartunik, aalisartut, piniartut, ingerlatseqatigiiffiit kattuffiillu oqaloqatigiiffiusunik ataatsimeeqatigineqarnerini aammalu najukkani suliniutit kisitsinerillu pillugit suleqateqarnerit pissarsiaasimasinnaapput. Tamatuma saniatigut aalisartut piniartullu ilaatigut pisanut allattuiffii, tunisineri aamma Piniarneq pisanullu killilersukkanut immikkut immersuiffissat, Pinngortitaleriffiup

ilisimatusarnerani paasissutissanut tunngaviusut pingaarutilerujussuit aqputigalugit paasissutissaataat ilaatinneqarput.

Nunanit tamalaaniit suliniaqatigiiffinit Pinngortitaleriffimmiillu nassuerutigineqarpoq, siunnersuisarnermut aalisartut piniartullu ilisimasaat annertunerusumik akuutinneqarsinnaasut. Assersuutigalugu NAMMCO, Imaprup avannaani immami uumasut miluumasut pillugit siunnersuisartoq atuisut akuutinneqartarnerinik annertusititsiniarluni suleqatigiissitamik pilersitsisimavoq.

KNAPK Pinngortitaleriffiup siulersuisuinut ilaasortaataqarpoq, aammalu aalisartut piniartullu ilisimasaasa Pinngortitaleriffiup suliaanut ilaatinneqarnissaannut, ukiunullu tallimanut tulliuuttunut Pinngortitaleriffimmi periusissiamik nutaamik, piniartut aalisartullu ilisimasaannik akuutitsinerpiamik annertusititsinissamik aammalu Kalaallit Nunaanni tamarmiusumi najugaqartut akuunerannik annertusititsinissamik pingaarutilittut suliaqarfiusumik suliaqarnermi akuutinneqarnissaannut qulakkeereqataasarpoq. Pinngortitaleriffik ilisimatusarnermi ileqqorissaarnissamut malittarisassat nutaat, aammattaaq akuutitsinissamik, najukkanut inissiinissamik ataatsimoorlunilu suliniutinik suliaqarnissamik aallutaqarfiusut ineriartortinneqarnerini suleqataareerpoq.

Naalackersuisut isumaqarput, pisuussutit uumassusillit pillugit ingerlatsinermi ilisimatusarnikkut siunnersuinerit atuisullu ilisimasaasa tunngavigineqartarnerisa ingerlaannarnissaa pingaaruteqartoq, aammalu pisuussutit uumassusillit pillugit ingerlatsinermi Naalackersuisut ilisimasaqarfinnik assigiinngitsunik inuiaqatigiillu soqutigisaannik isumaliuteqartarnertik ingerlatiinnartariaqaraat. Pinngortitaleriffiup Pinngortitaleriffik pillugu inatsit naapertorlugu ilisimatusarnikkut siunnersuisarnermik saqqummiussisarnerminik aallussinissaq ingerlatiinnartariaqarjaa.

Naalackersuisut siunnersuuteqartoq, piniartut aalisartullu ilisimasaannik ilisimatusarnikkut sulinermi atuisarneq nukittorsartariaqartoq pillugu oqarnerani isumaqatigilluinnarpaat. Aamma piniartut aalisartullu ilisimasaannik katersuinerit aaqqissuussamik ataqatigiissaakkamillu, aammalu piniagassanik salliutinneqartussanik, soorlu uumasunik ulorianartorsiortunik aallussiffiusumik ingerlanneqarnissaat pingaaruteqarpoq. Naalackersuisut isumaqarput Aalisarneq pillugu siunnersuisoqatigiit kiisalu Piniarneq pillugu siunnersuisoqatigiit ullumikkumit annerusumik peqataatinneqartariaqartut.

Matuma siuliani allassimasut tunngavigalugit aalajangiiffigisassatut siunnersuummut allannguutissatut siunnersuut manna Naalackersuisunit inassutigineqarpoq:

Pinngortitaleriffiup sulinerani piniakkat aalisakkallu pillugit piniartut aalisartullu ilisimasaannik akuutitsisarnerup annertusineqarnissaanut siunnersuusiornissaq siunertaralugu 1. April 2025 nallertinnagu Naalackersuisut Pinngortitaleriffimmi Ilisimatusarnermi Siunnersuisarnermut Ataatsimiititaliamut siunnersuusiornissaanik peqquneqarnissaannut siunnersuut.

Naalackersuisut taamatut oqaaseqarlutik pilersitsiviusumik nuannersumillu oqallinnissamut qilanaarput.